



錦西縣志

東園李西題



卷三

人物志

吾聞風俗推遷時升時降類非農工商賈所能爲也轉移之任必歸之文儒儒道盛則蒸蒸日新儒衰則不知其故錦西舊爲錦州縣境通德碩望或以科名顯或以文章著或以孝義聞攷之史傳往往而有殆山川靈秀之所鍾歟近今以來人物較少際此文明進步時代菁莪樸棧弦歌之聲日作後起者當不乏人矣作人物志

人物

名宦

漢

范明友 宣帝時人拜度遼將軍嘗將二萬騎出遼東擊烏桓破之遼東西之民賴以安輯以功封平陵侯

三國

牽招 字子經安平觀津人曹操將擊袁譚而柳城烏桓欲出騎助譚操以招嘗領烏桓遣詣柳城說令罷兵後從討烏桓至柳城拜護烏桓校尉文帝立拜招使持節護鮮卑校尉廣布恩信招懷降附至十餘萬落

晉

張華 字茂先范陽方城人都督幽州軍事撫納馬韓新彌諸國依山帶海去州四千餘里前代所未附者二十餘國咸來朝獻

陽耽 北平無終人清直端敏仕爲遼西太守慕容翰攻段氏於陽樂獲耽翰父廩甚敬禮之用爲謀主官東夷校尉

隋

韋冲 京北杜陵人文帝時封義豐侯遷營州總管冲寬厚得衆撫赫靺契丹皆能致其死力奚霫朝貢相續高麗王元率靺靺萬餘騎寇遼西冲擊走之

唐

張儉 字師約京兆新豐人以功累遷營州都督兼護東夷校尉營州部與契丹靺鞨奚霫諸部切畛高麗引衆入寇儉擊破之太宗征遼儉率兵渡遼水趨建安城破高麗兵封皖城郡公後改東夷校尉直都護府即以儉爲都護

薛仁貴 絳州龍門人名禮以字行躬耕時將改葬其先妻柳曰天子自征遼東求猛將君盍圖功名以自顯富貴還鄉葬未晚仁貴乃應募至安邑會郎將劉君印被圍仁貴馳救斬賊繫馬鞍由是知名王師攻安市高麗率衆拒戰仁貴白衣持戟鍵兩弓呼而馳所向披靡帝遣使馳問白衣者誰曰薛仁貴帝召見喜得彪將授遊擊將軍顯慶三年詔從程名振伐高麗破之於貴端城四年破溫沙多門於橫山及戰石城有善射者多殺官軍仁貴乃單騎突擊賊弓矢

俱廢遂生擒之乾封初授泉男生大破高麗拔扶餘威鎮遼海高麗平進檢校安東都護封平陽郡公移治新城撫孤存老賊隨材任職褒崇節義高麗士衆皆欣然忘亡

程名振 洛州平恩人破劉黑闥有功拜營州長史封東平郡王從征高麗拜平壤道行軍總管攻沙卑城破獨山陣害以少擊衆永徽六年以營州都督兼東夷都護擊高麗於貴端水焚其新城顯慶三年與大將豆方婁龍朔三年與蘇定方等復伐高麗敗之

王元志 天寶時爲安東都護安祿山反與營州侯希範共斬其親將詔拜元志平盧節度使兼御史大夫蘇源明奏德宗有云御王元志壓坐閭闔臨

幽都其爲時倚重如此

遼

耶律迪里 字薩喇六院部夷離堇蒲古只之後採訪使吼五世孫寬厚好學
工文詞重熙末補牌印郎君兼知起居注道宗清寧元年遷同知永州事禁盜
有功改北面林牙承旨九年重元作亂迪里赴援力戰平之遙授臨海軍節度
使十年遷武安州觀察使咸雍五年累遷長寧宮使檢括戶部司乾州錢帛逋
負立出納經畫法公私便之太康四年爲南院大王秩滿部民請留同知南京
留守事有疾上命乘傳赴闕遣太醫視之遷上京大安中改場母城節度使以
疾致仕加兼侍中賜一品俸八年卒

蕭烏納

一名撻不也字特默六院部人其先嘗爲西南面搜刺烏納魁偉簡

重書騎射清寧初兄圖獨以事入見帝問族人可用者圖獨以烏納對補祇候郎君遷近侍敝史護衛太保太康初爲北院宣徽使時乙辛已害太子因言宋魏國王和魯韓之子淳可爲儲嗣羣臣莫敢言唯烏納及夷離畢蕭陶隗諫曰舍嫡不立是以國與人也帝猶豫不決五年帝出獵乙辛請留皇孫帝欲從之烏納奏曰竊聞車駕出遊將留皇孫苟保護非人恐有他變果留臣請侍左右帝乃悟命皇孫從行由此始疑乙辛頃之同知南院樞密使事出乙辛淳等帝嘉其忠封蘭陵郡王人謂近於古社稷臣授殿前都點檢上謂王師儒耶律固等曰烏納忠純雖狄仁傑輔唐屋質立穆宗無口過也卿等宜達燕王知之自

是令烏納輔導燕王益見優寵大安初詔尙越國公主固辭改南院樞密使奏請椽史宜以歲月遷叙從之壽隆元年拜北府宰相初天祚在潛邸烏納數以直言忤旨及嗣位出爲遼興軍節度使遷太傅佛殿小底王華誣烏納借內府犀角詔鞫之烏納奏曰臣在先朝詔許日取帑錢十萬爲私費臣未嘗妄取一錢肯借犀角乎天祚愈怒奪太傅官降寧邊州刺史尋改臨海軍節度使烏納上書曰自蕭哈里亡入女直彼有輕朝廷之心宜益兵以備不虞不報天慶元年知黃龍府事改東北路統軍使復上書曰臣治與女直接壤觀其所爲其志非小宜先其未發舉兵圖之章數上皆不聽及金兵來侵戰於寧江州其孫伊德濟死之烏納退走入城留官屬守禦自以三百騎渡混同江而西城遂陷後

與蕭敵里拒金兵於長灤以軍敗免官五年授上京留守六年耶律章奴叛來攻京城烏納發府庫以資士卒諱以逆順完城池以死拒戰章奴無所得而去以功授副元帥尋爲契丹都宮使天祚以烏納先朝重臣有定策勳每延問以政烏納對甚切上雖優容終不能用以疾卒年七十

金

持嘉暉 字仲明其先附于遼居張皇堡後家萊州體貌雄偉慷慨有志略天輔六年從棟摩定興中府義錦等州及破張覺皆與有功授洛州刺史數立戰功再舉伐宋下保州真定暉皆與焉加桂州管内觀察使因留撫河間時居民皆爲軍士所掠老幼存者無幾暉下令軍中聽贖還之未幾皆安堵如故攻濟

州諭以禍福乃舉城降暉約束軍士無秋毫犯至餘杭通糧餉治橋道暉之力爲多及還載資治通鑑版以歸累功遷歸德軍節度使宗州舊無學暉爲營建學舍勸督生徒肄業者復其身人競趨之屬縣民家奴王夔者營業進士暉以錢五十萬贖之使卒其業夔後至顯官天德二年封河內郡王歲餘拜平章政事薨年六十五諡曰武

大懷貞 字子正遼陽人皇統五年除闔門祇候三遷東上闔門使累官右宣徽使爲武勝軍都總管大定中遷彰國安武軍節度使縣尉獲盜得一旗上圖亢宿詰之有謀叛狀株連幾萬人懷真請誅首亂者餘皆釋之嘗以私忌飯僧數人就中一僧異常懷貞問曰汝何許人也對曰山西人復問曾爲盜殺人否

對曰無之後三日詰盜果供此僧皆服其明改興中尹錦州富民蕭鶴壽塗中殺人匿府少尹家有司捕不得懷貞以計獲之置於法改彰德軍節度使

裕爾伯特 北京路庫本明安托囉山穆昆人以軍功歷海濱令在任御史臺察廉升同知震武軍節度使明昌六年除東北路招討使北邊有警圍慶州急伯特率本路兵往救敵解去承安元年爲先鋒副統授鎮寧軍節度使以六羣牧人叛改寧昌軍伯特爲都統領步騎萬人次懿州敵數萬來逆戰伯特奮力鏖擊卻之二年紮軍千餘出沒剽掠錦懿間伯特追敗之復獲所掠悉還本戶五年授知廣寧府事俄改東北路招討使以捍邊有功賜詔褒諭三遷爲崇義軍節度使泰和六年卒贈紫金光祿大夫

元

穆呼哩 蒙古人雄勇有謀與博爾濟博勒呼齊拉袞俱以忠勇事其主號爲都爾本庫魯克猶華言四傑也太祖命穆呼哩爲征遼東都總帥先是張鯨據金錦州自稱臨海王附於元元以鯨總北京十提領兵從多果朗南征鯨懷反側穆呼哩覺之令蕭勒森監其軍至平州鯨稱疾逗遛不進勒森執殺鯨鯨弟致憤其兄被害乃殺長史據錦州自稱瀛王改元興隆略平樂瑞利義懿廣寧等州下之穆呼哩帥師討致州郡復降致依險爲阻穆呼哩欲設奇取之乃遣權帥烏頁爾等別攻溜石山堡且諭之曰汝等急攻賊必往援我出其不意斷賊歸路可一戰擒也又令蒙古布哈別屯永德縣東伺之致聞溜石被圍果以

兵救蒙古布哈遣騎扼其歸路且馳報穆呼哩中夜引軍急馳比曙抵神水與致遇而蒙古布哈兵亦會前後夾擊致遂奔潰拔開義縣進圍錦州致閉門拒守月餘其下縛之降穆呼哩殺致遼西遂平穆呼哩進太師卒諡忠武

史天祥 燕之永清人太祖伐金署都鎮撫平興州趙守玉敗金將達魯進克興中府從穆呼哩平錦州張致又會契丹漢軍擒關肅復利州破尖山香爐紅螺塔山大蟲駱駝圍崖諸寨即命天祥統錦州軍拔蓋金蘇復等州遷鎮國上將軍利州節度使所部降民都總管

烏真爾 沙卜珠氏狀貌甚偉腰大十圍太祖五年烏真爾與珠卜諾延克金東京有功九年從穆呼哩取北京先驅下之授北京總管都元帥留撫其人綏

懷有方自京以南相繼降附趙守玉據興州烏頁爾討平之張致以錦州叛又攻破之太宗元年與薩里和爾齊征下遼東三年又與薩喇達征高麗下十餘城高麗請和送質帝大悅俾烏頁爾充北京東京廣寧蓋州平州泰州開元府七路征行兵馬都元帥鎮撫東陲甚著威望

石抹孛迭爾 契丹人歸太祖於雄州隸穆呼哩麾下命與元帥烏頁爾分領錦州紅羅山北京東路漢軍二萬又從徇地山東大名又從定山西授霸州都元帥令士兵屯田且耕且戰數年城市復完聚

胡秉彝 霸州人爲錦州知州初州民不業耕織秉彝編伊尹武侯耕田遺制及苗司農栽桑圖徧行都部又於城東築濟民園種桑百餘畦聽民移植雖蔬